



Untuk Siaran Segera

PTPTN PRIHATIN BANTU RINGANKAN BEBAN

Ampang, Selangor, 9 Ogos 2019 – PTPTN menziarahi waris Allahyarham Nik Azam bin Nik Abdullah, 44 tahun yang telah meninggal dunia akibat serangan jantung pada tahun 2017 yang lalu. Dalam kunjungan ini, Puan Amelia binti Anuar (balu Allahyarham), 45 tahun menerima wakalah zakat PTPTN berjumlah RM5,000 di kediaman mereka di Taman Bukit Indah.

Melalui sumbangan ini, RM4,000 merupakan bantuan perbelanjaan keperluan harian manakala bakinya (RM1,000) didepositkan dalam akaun SSPN-i yang dibuka untuk empat (4) anak-anak beliau yang masing-masing menerima RM250.00 seorang.

Penyerahan sumbangan dibuat oleh YBhg. Encik Wan Saiful Wan Jan, Pengerusi PTPTN. Turut hadir Puan Mastura Mohd Khalid, Timbalan Ketua Eksekutif (Dasar dan Operasi), PTPTN serta Encik Mohd Sabirin Mohd Sarbini, Ketua Divisyen Kutipan, Lembaga Zakat Selangor.

“Pemberian bantuan sumbangan ini mengikut keperluan penerima. PTPTN sentiasa mempergiatkan program tanggungjawab sosial korporat (CSR) untuk membantu golongan asnaf yang memerlukan bantuan terumanya dalam bidang pendidikan. Sumbangan SSPN-i daripada PTPTN ini merupakan permulaan dalam membantu penabungan pendidikan untuk golongan asnaf bagi membolehkan anak-anak melanjutkan pengajian ke menara gading seterusnya mengubah nasib keluarga. Pada kali ini, PTPTN membawa kelainan dengan melaksanakan ziarah sebagai program turun padang dengan kerjasama Lembaga Zakat Selangor,” kata Pengerusi PTPTN, Wan Saiful Wan Jan.

Kewujudan Skim Simpanan Pendidikan Nasional (SSPN) sememangnya merupakan suatu anugerah kepada rakyat Malaysia kerana instrumen ini merupakan pelan

simpanan terbaik yang direka khas oleh kerajaan khusus untuk warganegara Malaysia tanpa mengira pendapatan bertujuan untuk membantu perancangan kewangan bagi tujuan pendidikan.

SSPN-i memberi kelebihan kepada keluarga yang berpendapatan rendah melalui insentif geran sepadan sehingga RM10,000 bagi satu keluarga mengikut jumlah simpanan dengan syarat-syarat tertentu. Masa depan anak-anak turut terjamin walaupun kematian ibu/ bapa kerana terdapat perlindungan takaful dari RM40,000 sehingga RM1 juta yang diberikan oleh SSPN-i Plus. Rakyat Malaysia yang beragama Islam juga tidak perlu khuatir kerana simpanan pendidikan ini sentiasa berpandukan kepada sistem kewangan yang patuh syariah, selain simpanannya yang dijamin oleh kerajaan. Ibu bapa turut mendapat faedah sampingan menerusi dividen yang kompetitif. Dividen tahun 2018 adalah sebanyak 4 peratus di mana ia lebih tinggi berbanding dividen bagi simpanan di institusi-institusi kewangan yang lain.

Melalui penabungan SSPN rakyat akan menikmati pelbagai keistimewaan dan manfaat apabila menyimpan. Berdasarkan pembentangan Bajet 2019, kerajaan telah menaikkan insentif pelepasan taksiran cukai untuk SSPN daripada RM6,000 kepada RM8,000 bermula tahun taksiran 2019. Dengan peningkatan ini, disasarkan lebih ramai masyarakat Malaysia yang dikenakan cukai pendapatan merebut peluang dengan membuat simpanan dalam SSPN.

Untuk menghargai pendeposit SSPN sedia ada dan menarik pendeposit baharu serta sempena ulangtahun SSPN-i yang ke 15 tahun pada tahun ini, PTPTN turut mengadakan kempen Cabutan Hadiah 15 Tahun SSPN-i dan Cabutan WOW! SSPN-i Plus tahun 2019 secara serentak melibatkan RM1.1 juta hadiah untuk dimenangi.

Semenjak tahun 2015, PTPTN secara proaktif mengubah persepsi masyarakat sebagai Tabung Pendidikan melalui simpanan awal dan bukan perbadanan yang menyediakan pinjaman semata-mata. PTPTN mula memperkenalkan produk Skim Simpanan Pendidikan Nasional (SSPN) pada 2004 untuk SSPN-i dan kemudian memperkenalkan SSPN-i Plus pada tahun 2015 yang merupakan simpanan pendidikan untuk membantu perancangan kewangan ibu bapa secara konsisten pada setiap bulan.

“PTPTN merupakan sebuah entiti kewangan yang bukan sahaja menyediakan pinjaman, tetapi juga menyediakan skim simpanan iaitu SSPN, pilihan terbaik

tabungan pendidikan untuk rakyat Malaysia ke menara gading. Simpanan pendidikan melalui PTPTN ini perlu di ketengahkan dan di war-warkan secara agresif kepada rakyat kerana PTPTN tidak mahu rakyat terus rugi dan tidak dapat menikmati keistimewaan simpanan SSPN yang disediakan kerajaan. PTPTN akan terus berusaha lebih keras dan ibu bapa perlulah meraih peluang yang ada untuk menabung demi masa depan anak-anak. Melalui penabungan, mari kita bina impian dan harapan mereka,” tambahnya lagi.

Ketika sesi ziarah ini, Lembaga Zakat Selangor turut mengemukakan surat kelulusan bantuan bulanan zakat kepada penerima sebanyak RM500.00 sebulan bermula bulan Mei 2019.

Mengenai PTPTN dan SSPN

Perbadanan Tabung Pendidikan Tinggi Nasional (PTPTN) ditubuhkan di bawah Akta Perbadanan Tabung Pendidikan Tinggi Nasional 1997 (Akta 566) yang berkuat kuasa pada 1 Julai 1997. PTPTN memulakan operasi pada 1 November 1997 dan bertanggungjawab menguruskan pinjaman untuk tujuan pendidikan tinggi dan mengutip pembayaran balik pinjaman; menyediakan skim simpanan dan menguruskan deposit bagi tujuan pendidikan tinggi; serta melaksanakan sebarang fungsi lain yang diamahkan kepada PTPTN oleh mana-mana undang-undang bertulis.

Skim Simpanan Pendidikan Nasional (SSPN-i) adalah merupakan satu skim atau instrumen simpanan yang direka khas oleh PTPTN bagi tujuan pendidikan tinggi. Di bawah SSPN ini terdapat dua produk iaitu SSPN-i (yang dilancarkan pada tahun 2004) dan SSPN-i Plus (yang dilancarkan pada tahun 2015).

Hubungi:

- i) Pn. Rina Abd Rahman di rina@ptptn.gov.my (019 - 3888 733); atau**
- ii) En. Muhammad Haikal Asmawi di haikal@ptptn.gov.my (010 - 6568 510)**

-tamat-

Disiarkan oleh: Perbadanan Tabung Pendidikan Tinggi Nasional (PTPTN)